

## ILASSUTITUT ISUMALIUTISSIISSUT

### Uunga siunnersuut: Aalisarneq pillugu Inatsisartut inatsisaata allanngortinneqarnera pillugu Inatsisartut inatsisaat.

(Naalakkersuisut aappassaaneerpeqarnissaanut saqqummiussaaf)

#### pillugu

#### Aalisarnermut ataatsimiititaliap

#### ISUMALIUTISSIISSUTAA

Inatsisartut Aalisarnermut, Piniarnermut Nunalerinermullu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Hans Aronsen, siulittaasoq, Inuit Ataqtigiit

Inatsisartunut ilaasortaq Andreas Uldum, siulittaasup tullia, Demokraatit

Inatsisartunut ilaasortaq Anders Olsen, Inuit Ataqtigiit

Inatsisartunut ilaasortaq Hans Enoksen, Siumut

Inatsisartunut ilaasortaq Siverth K. Heilmann, Atassut

#### 1. Allannguutissatut siunnersuutip ataatsimiititaliamit suliarineqarnera

Ataatsimiititaliap ataatsimiinnermini ulloq 24. november allannguutissatut siunnersuut oqaaseqafigalugu suliaraa.

#### 2. Ataatsimiititaliap inassutaa

Ataatsimiititaliami amerlanerussuteqartut Inuit Ataqtigiinneersut aamma Demokratineersut allannguutissatut siunnersuut akuerineqassasoq inassutigaa.

Ataatsimiititaliami ikinnerussuteqartup Siumumeersup allannguutissatut siunnersuut itigartitsissutigineqassasoq inassutigaa, siunnersuullu pillugu ima oqaaseqaateqarlutik:

Aalisarnermi inatsisissaq pillugu suliaq assut sinerissami aalisartut eqaarsaatigalugit Siumumiit ilungersunarluinnartutut isigalugu makkuninnga oqaaseqarfigissavarput, aammalu oqaatigissavara akerliunniannarluta akerliunnginnatta isumaqataannnginnitsinnullu tunngavilersuutigut tikissavakka uku oqaaseqarfigilaariarlugit tassalu Inatsisissami allannguutissatut siunnersuutigineqartut.

Siumumiit apeqqusinnngisaannarparput pisuussutit uumassusillit illersorneqarlutik siunissami iluaqutigineqarlutik inuiannit kalaallinit iluaqutigineqarnissaat atorluarneqarnissaallu.

Aammalu inatsimmik ersarissumik tunngavissineqarluni aalisarnerup ingerlanneqarnerani paasissutissat tutsuiginartut pissarsiarisarnissaat, kiisalu pisortanut paasissutissanik tunniussisussaatanermik piunasaqarneq tuungaviatigut Siumumiit isumaqatigisinnaagaluarlugu allatut ajornartumik itigartittariaqassallugu oqaatigeerissavarput. Imaaangilaq taakku akerlerigatsigit Siumumiimmi pingaartittuarsimavarput pisuussutit uumassusillit akisussaassuseqartumik atorneqarlutillu iluaqutigineqarnissaat.

Kisianniliuna inatsisissap suliarineqarnerani pissutsit akuersaarsinnaanngisagut makku pissutigalugit aalisarnermut inatsisissaq akuersaarnianngikkipput.

Siumumiit suli ilungersuutigeqqinniarparput pisassanik aqutsinermi siunnersuuteqarnermilu atuisut ilisimasaasa, tassalu aalisartut piniartullu aamma siunnersuinermut atorluarneqarnissaat assut kissaatigatsigu makku pissutigalugit.

Uumassusilinnik iluaquteqarnissaq illersorneqarsinnaasumik ingerlanneqassappat ilisimatuut kisimik siunnersuisarneri aallaavigineqassappata ernumatigaarput atuisut ilisimasaasa atorneqaratik qarsupiinneqartarnissaat.

Assersuutigalugu aanna uppernarsaatissaq piffissami kingullermi Qaanaami piniartut aavernut pisasseqqinneqarnissaminut qinnuteqarnerminni ilisimasaasa soqutigineqanngivillutik siunnersuinermi atorneqaratilluunniit tusaaneqaratillu qaanngiinneqarmata. Aammalu Tunumi piniartut nannut pillugit ilisimasaat aamma taamatorpiaq soqutigineqaratik qaangiinneqartarmata.

Taamaattuminguna Siumumiit ilungersuukkipput atuisut aalisartut piniartullu ilisimasaasa aamma ilanngullugit ilisimatuut siunnersuineranni atorneqartarnissaasa qularnaarlugit inatsimmut ikkunneqarnissaat, tassami taakkuupput piniartut aalisartullu pinngortitamik uummassusilinnillu aamma ullut tamaasa atuiarnermikkut ilisimasaqarnerpaajusut ilisimatuunik atorluarneqarsinnaalluartut.

Taavalu umiatsiararsortut aalisarnermut akuersissummut akilisalnissaat Siumumiit isumaqataaffiginnngilluinnarparput makku pissutigalugit. Sinerissami aalisagarniarnermi akit appariartuinnarfiini eqqunngilluinnarmat umiatsiararsortut akuersissummut akiliisalnissaat.

Aammalu ukiap ingerlanerani puisit amiinut akit apparneqarput suli inuuniarnikkut ilungersunartorsiortitsinerulersumik, aammalu piniakkanik killilersuinerup Naalakkersuisuniit ingasattumik sukaterneqarnerani umiatsiararsortut akiliisinnaanerat killeqarlunnartoq suli ilungersunarnerulissaaq, naak Aalisarnermut piniarnermullu naalakkersuisoq aalisarnermi inatsisissap siullermeernerani oqalukkaluartoq umiatsiararsortut 1.milliuiniit qulaallugit isertitaqartarmata 1500.00 kruunninnguanik akiliigaluarunik maluginavianngikkat.

Taamatullu oqarneq Aalisarnermut naalakkersuisumiit umiatsiararsortut pisoorsuunerarlugit uagut Siumumiit isumaqatiginngivipparput, nalunnginatsigu inuuniarnikkut ilaatigut ullormiit ullormut piffissap killerpiaani inuuniarsarisut allaat motoriarangamik ilaat ingerlariaqqinneq sapilersartut aningaasarsiornertik killeqanngaarmat.

Taavalu angallatit sinerissami aalisagarniartut tassalu pujortuleeqqaniit qummut aamma akuersissummut akiliisalissapput tassalu saarullinnut qalerallinnut nipisanut saattussanullu aalisarniarunik taakkununga tamatigut immikkut 1500.00 kruunit akileqqaartalissapput tamannalu Siumumiit akuersaarsinnaanngilarput.

Sinerissami rejerniartut tamarmik aamma tons-imut ataatsimut 60.00 kruunimik akiliisalissapput sinerissami aalisariutit rejerniutit nutaanngilisimapput imminullu akilersinnaasumik ingerlasinnaanerak killeqartorujussuupput aserfallatsaaliinerit akisuallaanerak pissutigalugu taamaattumik aamma ilaasa akiliisinnaanerat killeqarmat sinerissami rejerniartut pisassaminut akiliisarnissaat Siumumiit akuersaarsinnaanngilarput.

Taavalu akiliisitsinissamik piunasaqarneq ulloq akiliiffissamik killissaqartitsivoq tassalu akuersissut akilerneqareersimassaaq kingusinnerpaamik 1.januar kikkut umiatsiararsortut akissaqassappat ukiup taamaalinerani akuersissummik pisinissaminnut ilaat akissaqassapput kisiannili ilarpassui akissaqarnaviangillat.

Aammalu rejerniartut pisassamik amerlassusiannut ukiup aallaqqaataani akilereersimassapput kisiannili aamma periarfissineqassallutik kingusinnerpaarpaamik 1.april akiliisinnaatitaallutik.

Sinerissami umiatsiararsortut angallatillu aalisagarniartut aammalu rejerniartut akiliisinneqassapput akuersissutinut tamannalu assigiinngisitsineruvoq akuersaarneqarsinnaangitsoq tassami avataani qaleralinniat saarullinniallu akiliutissaat 22.million kruunit Naalakkersuisut peerpaat, kisiannili umiatsiararsortut sinerissami angallataatillit rejerniartullu akiliisinneqassapput tamannalu Siumumiit akuerisinnaangilluinnarparput.

Taamatut Siumumiit oqaaseqarluta aalisarnermi inatsisissaq akerleralugu taasissaagut isumaqaratta innuttaasut avaqqutiinnarlugit inatsisissaq aalajangersarniarneqartoq.

**Ataatsimiititaliami ikinnerussuteqartup<sup>t</sup> Atassummeersup<sup>t</sup> allannguutissatut siunnersuut itigartitsissutigineqassasoq inassutigaa<sup>t</sup>, siunnersuullu pillugu ima oqaaseqaateqarlutik:**

Imm. 95-ip siullermeerneqarnerani Atassummit isummat oqaaseqaatillu saqqummiussagut aalajangiusimavagut. Atassut isumaqarpoq kalaallit aalisarneranni atuisut akiliuteqartinneqartarnissaat atuutilersissallugu piffissaangitsoq. Inuussutissarsiummi arlaatigut akiliuteqartarnissaq Atassutip tunngaviatigut tapersersorsinnaavaa. Kisiannili tamanna ilimagisat misigissuserlu tunngavigalugu atuutilersinneqartariaqanngilaq. Atassut isumaqarpoq atuisut akiliuteqartarnerat inuussutissarsiortut akilisinnaassuseqarnerisa aningaasarsiornikkut peqqissaartumik sukumiisumillu misissoqqissaareerneratigut aatsaat atuutilersissinnaasariaqartoq, taamaalilluta inuussutissarsiutip aningaasarsiornera innarlissannginnatsigu, tamatumanittaaq nunatta isertitaqarnissamut periarfissaqarnera.

Atassutip aammaarluni Inatsisartunut ilaasortat nunarsuarmi aningaasarsiorluarnerpaat annertuumik ajornartorsiuteqarmata erseqqissaaviginiarpai, tamannalu soorunami nunarsuarmi niuffaffimmi aalisarnermik inuussutissarsiortut akinut pissarsiaannut sunniuteqassaaq. Aalajangiisartut tuaviupilulluta aalajangiisariaqanngilagut, inuussutissarsiuppullu pingarnerpaaq aningaasarsiornikkut ulorianartorsiortillugu. Tamatuma saniatigut Atassut isumaqarpoq umiatsiararsortut akuersissummut 1.500 kr.-nik akiliissanngitsut. Imaassinnaavoq aalisartut ilaat pissutissaqarluartumik taamatut akiliisinnaasut. Taamaattorli naliliinerput tunngavigalugu umiatsiararsortut amerlasuut kaasarfimminnit 1.500 kr.-it amoriaannaanngilaat. Taamaattumik isitsinnit isigalugu umiatsiararsorlutik aalisartut akuersissummut akiliuteqartarnissaat inuuniarnikkut tulluurtuunngilaq, taamaattumillu ataatsimilluunniit tamanna tapersersorsinnaanngilarput. Taamaattumik Atassummit Inatsisartut aalisarnermik inuussutissarsiortut akiliuteqartarnissaannik allannguutissatut siunnersuummik tapersersuinnginnissaannik kaammattorusuppagut, aningaasarsiornikkummi ajornartooneq pissutigalugu tamanna tulluurtut isiginngilarput, kiisalu aalisarnermik inuussutissarsiortut taamatut aningaasatigut immikkut nammatassinneqarnerisigut taamatut artukiinermi nammataqarsinnaaneritut misissueqqissaarnerup amigaataanera uparuarusullugu.

Taama oqaaseqarluni siunnersuummillu siuliani allassimasunut paasinninnerit tunngavigalugit Inatsisartut Aalisarnermut, Piniarnermut Nunalerinermullu Ataatsimiititaliaata siunnersuut Inatsisartunut aappassaaniigassanngortippaa.

, Siulittaasoq

, Siulittaasup tullia